

24 SEPTEMBRIE

PARACLISUL

SF. CUVIOS

SILUAN ANTONOV

DE LA

SF. PANTELIMON-

ATHOS

PARACLISIER-RU



ΒΑΣΙΛΕΥΣ

Ο

ΚΑΙΣΑΡΕΥΣ

ΕΝ ΤΩ
ΚΕ ΜΕΝ
ΠΑΤΕΡΕΣ
ΟΙ ΤΗΣ
ΕΚΚΛΗΣΙΑΣ
ΕΝ ΤΩ
ΚΑΙΣΑΡΕΥΣ
ΕΝ ΤΩ
ΚΑΙΣΑΡΕΥΣ

МОЛЕБНЫЙ КАНОН ПРЕПОДОБНОМУ И БОГОНОСНОМУ ОТЦУ НАШЕМУ СИЛУАНУ АФОНСКОМУ

Благословившу священнику, начинаем:

Псалом 142

Слава и ныне: Аллилуиа

Бог Господь и явился нам: со стихи: Таже:

Тропарь Преподобному, глас 4:

Сладостию Духа напаяем / и теплотою Христовы
любве согреваем / с плачем искал еси Христа в
житии твоём / и Того Смиренна и Кротка
слезами изобразил еси в нас / умильно зовущих
ти. / Печалию твоею наполнихомся веселия
нетленного, / Силуане, утешителю наш и
молитвенниче вселенных.

Слава,

Ин тропарь, глас 3:

Дух Святой научи тя любить Бога и человека /
лицезревий Христа, исполнился еси
неописанного смирения / и был еси источник

слез о вселенней / проповедаая всем: "Любите враги ваша". / Не забуди убо ихже возлюбил еси / Силуане, Преподобне Отче наш, / посещая чад твоих / и моляся присно Господеви / даровати нам святое Его смирение.

И ныне,

Богородичен, глас 4:

Всех скорбящих Радосте / светлый Покров вселенная Ты еси, Владычице, / в крове крылу Твоею покрой и Обитель сию / в славу милостиваго Сына Твоего возложенную / к Тебе бо день и ночь взываем / в скорбех и болезнях, смиреннии раби Твои, / буди пристанище спасения нам / и вся настави к тихому свету Христовых заповедей / со Предтечею и Силуаном преподобным / в мире и любви управляющи живот наш. / Ты бо еси иноком отрада / и сладчайшая утеха душ наших, / Дево пренепорочная.

Псалом 50: Помилуй мя, Боже.

И канон

СКОРБЯЩИХ НАС УТЕШИ СИЛУАНОМ,
МИЛОСТИВЕ

ПЕСНЬ 1 - Глас 8:

Ирмос: Воду прошед яко сушу, и египетскаго зла избежав, израильтянин вопияше: Избавителю и Богу нашему поим.

Преподобне Отче Силуане, моли Бога о нас. Скорбьми и болезньми обремененнии к тебе прибегаем, Силуане Отче наш, утешения ищуще: о носителю дивный Духа Святаго, одожди сердца наша росую умиления.

Преподобне Отче Силуане, моли Бога о нас. Книгу твою, одушевленную дыханием Духа, яко залог нетленных отеческия любве оставил еси нам, юже чтуще мним слышати твой тихий глас, вызывающий нас от бездны греха к исправлению жития.

Слава: Охладе любы многих за умножение беззакония, и мраз ноци безлунныя объят нас, но вжег светильник молитвы твоея, Отче, разреши мглу страстей и согрей сердца наша сладчайшим светом милости Божия.

И ныне: Радость всех скорбящих, алчущим питательница, бездомных светлая обитель, обуреваемым тишина Ты еси, Владычице, со преподобным Силуаном не перестай молящися да познают вси людие Сына Твоего Духом Святым.

ПЕСНЬ 3

Ирмос: Небеснаго круга верхотворче Господи, и церкви зиждителю, Ты мене утверди в любви Твоей, желаний краю, верных утверждение, едине Человеколюбче.

Буди нам отец и покровитель, Силуане благосердне, отри слезы беззащитных сирот, прохлады души, изнемогающия тяготами житейскими, и всем даждь разумети, что есть отрада Господня.

Яко глубочайший сосуд, исполни даров Пресвятаго Духа, изливай нам тишину божественную, яко буря злых обдержит ны и вопием ти от сердца: умири жизнь нашу миром Христовым, преподобне.

Слава: Щадити всех и вся учил еси, верный органе Святаго Духа, и ныне невидимою рукой прикоснися очесем нашим да узрим славу Божию в братии нашей и потечет, яко поток огненный, молитва, милующая всякую тварь. И ныне: Именем Твоим, Владычице, горы искапают сладость, холми яко агнцы взыграются, и земнороднии вси радости неизглаголанная исполняемься, поюще Тя, ширшую небес и чистшую светлостей солнечных, осеняющую мир милосердием Твоим.

Спаси от бед рабы Твоя, Богородице, яко вс по Бозе к Тебе прибегаем, яко нерушимей стене и предстательству.

Моли Бога о нас, Преподобне Отче Силуане, яко мы усердно к тебе прибегаем, скорому помощнику и молитвеннику о душах наших.

Ектенія сугубая: Помилуй нас, Боже:

Тропарь, глас 2:

Плачущим сокровенное радование, боримым защитниче и сирым помощниче, нищих и убогих покровителю, заступник за простыя и смиренныя люди и всему миру печальник ты еси, потщися избавити ны от бед и напастей, Силуане Отче наш, яко обнищавом зело во гресех.

ПЕСНЬ 4

Ирмос: Услышах, Господи, смотрения Твоего таинство, разумех дела Твоя, и прославих Твое божество.

Хлебом жизни укрепи руце ослабленныя и колени разслабленныя, Силуане, яко уны дух наш от страха и чаяния грядущих на вселенную; да утешатся малодушнии зрением Господа всепрощающа и не убоятся ктому, имуще

Христа крепкаго поборника.

Ныне зряй непостижимо красоту Лица Господня и наслаждайся райския доброты, не гнушайся безобразия нашего, Отче, но дай помысл умиления, да покаянием обрящем паки Образ Христова благолепия.

Слава: Аще и время твоих скорбей прейде, Силуане дивне, обаче утробою Христовою не перестаети сострадати нам, бедствующим на земли, и во свете невечернем приносиши о нас слезы неизреченныя любви, ихже ради вси сладости утешения исполняемся.

И ныне: Сыны Твоя нарече нас распятый Господь, Чистая, темже от греховныя тьмы избавивльшихся яви нас воистину чада Божия, да со дерзновением воззовем: "Отче наш Небесный, слава Тебе, благоволившему породнити нас Страстьми Христовыми".

ПЕСНЬ 5

Ирмос: Просвети нас повелении Твоими, Господи, и мышцею Твоею высокою, Твой мир подаждь нам, Человеколюбче.

Уязвленные страстьми многими не презри нас, Отче, яко близ есмы отчаяния, но милосердне обвяжи раны наша, и слезами пречистыми покажи ны паки паче снега чистейшия.

Тек яко орел на высоту смирения, вещим взором приникаеши в глубины богословия, и нам, слепым, даруй прозрение Духом Святым, Отче, да исполнимся божественных догматов и православно прославим Троицу Единосущную во веки.

Слава: Егда удари Моисей жезлом камень, потекоша воды в пустыни, и ныне ты, Отче, острием словес твоих уязви ожесточенная сердца наша, да напоимся струями живоносными, и возсияет нам из купели слезных чудный Свет Воли Божия.

И ныне: Шипок тайных рая Богоматерняго, на Горе Святей прозябший, ныне благоухаеши вселенную всю ученьми твоими, Мудре, и нам погибающим от яда тлетворнаго буди воня Христова в живот вечный.

ПЕСНЬ 6

Ирмос: Молитву пролию ко Господу, и Тому возвещу печали моя, яко зол душа моя исполнися, и живот мой аду приближися: и молюся яко Иона: от тли, Боже, избави мя. Источник жизни помози найти заблудшим в пустыни мира, и нас притекающих к тихим струям словес твоих, Силуане богомудре, напой реками воды живыя, истекшими от чрева твоего.

Слез наших не премолчи, Силуане блаженный, якоже сам в житии твоём в плаче истаяваем, познал еси томление души отпадшия от Бога, темже явился ныне помощник державный всем сокрушенным скорбьми житейскими.

Слава: Имуще тя питателя жизни нашея, Силуане милостивый, вопием: дай нам пищу благодати, яко глад Божий постиже нас, Отче, дай нам, жаждущим, живую воду богоразумия Духом Святым, и в теплую ризу обледи ны любви божественныя.

И ныне: Людие да веселятся, осеняемии тайным пришествием Богоматере, покрывающия вся скорби земли, к Нейже души наша влекутся непрестанно любовью, ублажающе Ю гласы твоими, Силуане, яко радость и упование наше.

Ектения сугубая, священник поминает о здравии

Кондак, глас 6:

Слезами благосердными сеяный скорби постныя, преподобне Отче, ныне же собираеши многоперстныя класы радостию, яко плод чрева, приводя Христу чада твоя от всех конец земли. О дивне Силуане, тобою да очистимся на гумне покаяния, и ветром любоблагоутробия Своего развеет Господь плевую дел наших, и яко

пшеницу чистую затворит ны в небесную житницу, и в недрах твоих упокоимся во веки.

Прокимен, глас 4:

Честна пред Господем смерть преподобных Его.
Стих: Терпя потерпех Господа и внят ми и услыша молитву мою.

От Матфея святого Евангелия чтение:

Рече Господь Своим учеником: Вся Мне предана суть Отцем Моим, и никтоже знает Сына токмо Отец, ни Отца кто знает токмо Сын, и емуже аще волит открыти. Приидите ко Мне вси труждающиеся и обремененнии, и Аз успокою вы. Возьмите иго Мое, и научитесь от Мене, яко кроток есмь и смирен сердцем, и обрящете покой душам вашим. Ибо бо Мое благо и бремя Мое легко есть.

Слава: Глас 6:

Молитвами Преподобнаго Твоего, Милостиве, очисти множества согрешений наших.

И ныне: Молитвами Богородицы, Милостиве, очисти множество согрешений наших.

Помилуй мя, Боже, по велицей милости Твоей, и по множеству щедрот Твоих, очисти беззаконие мое.

Глас 6:

Царствие Отчее оставив и богатство нетленных даров безумно расточив, ныне гладом одержим есмь и точию стенания и слезы в достояние мне, темже обращаюся, молю тя, Силуане преподобне, яко сам шел еси стезею блуднаго, помози и мне обрести путь и дом Отца Небеснаго, дай же узрети ми Господа милосердствующа тепле, текуща же и кротко отверзающа ми объятия отеческая, да наслаждуся паки пищи безсмертия и с тобою прославлю желаннаго Спаса, неизреченную и непостижимую имеюща милость.

Спаси, Боже, люди Твоя, и благослови достояние Твое:

Господи, помилуй , 12 раз

ПЕСНЬ 7

Ирмос: От Иудеи дошедши отроци, в Вавилоне иногда, верою троическою пламень пещный попраша, поюще: Отцев Боже, благословен еси. Угасе в нас огонь благодати и небо затворися нам, но даждь нам помощь от скорби, Силуане Отче наш, и просвети нас пети во смирении и любви даже до последняго издыхания: Отцев Боже, благословен еси.

Адовы ужасы, яко скимни, обыдоша нас, но моления твоя стяжахом яко покров божественный, имже покрываеши нагия дерзновения, Отче милостиве, и сердца согреваеши печалию греховною унывающия. Слава: Неописаннаго смирения Христа Бога вкусивый, во вся дни живота твоего смирялся еси жестоко, Отче, и нас научи стяжати кроткаго и смиреннаго Духа, да не погубим благодати ктому и не возрыдаем о ней адамовым рыданием.

И ныне: О всепетая Мати, рождшая всех святейшее Слово, вдохнови нам слово пламенное да сынолепне воспоем милость Твою, еюже матерски болезнуеши о скорбющем мире, якоже возвести нам Силуан, таинник Твой.

ПЕСНЬ 8

Ирмос: Царя Небеснаго, Егоже поют вои ангельстии, хвалите и превозносите во вся веки. Милующее вемы сердце твое, Силуане, яко на земли тайно научаем Духом Святым выну скорбел еси о грешницех, в молитвах проливая слезы о них, темже утробу твою сострадательную ныне отверзи и нам, сирым твоим.

Молитвою слезною укрепи нас утренивати от нощи греховныя, Силуане Отче наш, и во свете

нетленные любви, веселыми ногами пойдём с тобою за утренней Звездой, Христом, славяще Его во вся веки

Идеже любви, тамо и печаль, яко и любви присно состраждет, темже, Отче милостиве, пой нам, скорбящим на земли, песнь, ейже научи тя Дух Святой, и расширится сердце наше теши путь крестный даже до конца.

Слава: Лики ангельскими неизреченно воспеваемую, ныне зриши во славе Матерь и Деву, Юже умоли, любоблагоутробне, ниспослати нам богородичную благодать, еже матерним сердцем болезновати о всех, яко о присных детех.

И ныне: От змия греховнаго Симеона юнаго спасла еси, Мати, на стези покаяния наставивши, и души наша, иссохшия от горести уныния наслади посещением Твоим и исправи, яко жезл, непорочно сохранить пути жестоки, любви ради Сына Твоего.

ПЕСНЬ 9

Ирмос: Воистину Богородицу Тя исповедуем, спасеннии Тобою, Дево чистая, с бесплотными лики Тя величающе.

Се вся земля скорбит и взывает ти гласом нашим, Отче всемирне: Научи нас смирить себе и любить враги да вселится в ны Дух Святой и

обрящем небесное Царство с тобою.

Труждайся паче человека, пророчески приял еси во чреве, страха ради Господа, и поболел и родил еси нам духа спасения Божия, имже веселиши многия, Отче, и росую слез твоих исцелиши вся поюция ти: Радуйся, Силуане, утешителю наш.

Изнеможе всякое слово, и токмо въздыхания сердечная оставишася нам, но глаголы твоя украдше, приносим ти последний сей глас: Силуане, Отче наш, моли о нас, детех твоих ныне и в час судный, да будем с тобою на небесех, слышаще песни, яже поются Духом Святым.

Слава: Видел еси Свет истинный, приял еси Духа небеснаго, таинниче благодати, да свободимся и мы тобою всякия прелесте, Силуане, и научимся поклоняться живоначальной Троице духом и истиною.

И ныне: Елей светильника нашего оскуде, и мрак смертный найде на нас, но возсиявши, пречистая Заре, введи ны в чертог Христов да причастницы будем тайныя Вечери Агнца со Отцами нашими и с Тобою, девственная Радосте небесных и земных.

ДОСТОЙНО ЕСТЬ ЯКО ВОИСТИНУ:

И кадит священник жертвенник и люди, и мы поем настоящая величания, глас 6:

Обитель твою не остави, Силуане, посещаяй нас в тайне на всяк день и моления исполни молящихся в храме твоём, яко ты вемы промыслителя о жизни нашей.

В мире глубоцем сохрани место сие, и любовь неразрушимую изливай нам всегда да согласно славим прославльшаго тя Духа.

Листвием прохладным покрый нас от зноя страстей и плодами насыти Духа Святого, яко ты, обретохом древо жизни, Силуане, всем приступное, и блажим твой отеческий покров. Дивный цвет земли русския, пустыни Афонския тайное прозябение, вселенней же всей украшение, Силуана великаго песньми почтим. На тя, по Бозе и Богородице, надежду нашу возложихом, Силуане милостиве, буди неусыпный пастырь стаду твоему ныне и в час испытания, да узрим тогда твой зрак преподобный и всесветлый.

Ковчег мощей твоих испускает благовонное дыхание Духа, егоже лобызающе верою, веселия исполняемся несказаннаго и исцеление приемлем души же и тела.

В последняя скорбящим даровася утешитель, сидящим во тьме воссиял светило, недужнии же обретоша целителя, и мы, унаследовавше тя близкаго и приснаго Отца, благодарно славим Христа во веки.

Идеже обрящентся отец, тамо и сын спребывает,
Отче Сиулане, славы, еяже причащаешия ныне
сподоби сына твоего Софрония, иже ты достойно
почти.

Свят сый, Сиулане, отцелюбива восприими
ученика твоего, изрядна жизнеписателя и язык
твой явльшася, Софрония, таинника и
приемника твоего.

Обитель на земли яко живый памятник
воздвигша тебе, Сиулане, введи ныне Софрония,
верна послушника твоего в селение твое на
небесех, и обитель сию утвердите о любви вашей
до скончания века.

сладкогласно:

ГЛАС 2

Возведи ны на гору высокую, боговидче
Сиулане, и покажи нам, как обещал, кроткое и
милостивое Лице Христа, якоже обещался еси,
отверзи слух наш молитвенным
прикосновением, и услышим сладкий глас
Господень, дарующий всем оставление, да
изыдет молитва всея земли, как прекрасный
тихий облак, освещенный солнцем, и
возрадуются небеса, поюще песнь величания
Господу за страдания Его, имиже спасе нас.
Все упование наше на Тя возлагаем, Мати
Божия, сохрани нас под кровом Твоим.

ГЛАС 8

Духа Святого обнови во утробе нашей,
молитвами твоими, Отче, и ниспошли свыше на
вся сыны земли дух истиннаго благочестия, да,
якоже море наполняют воды, тако вселенная
исполнится нетленным Светом богоразумия, и
все языцы единем усты и едином сердцем
славят Творца, Отца и Сына и Святаго Духа во
веки.

Владычице, прими молитвы раб Твоих и
избави нас от всякия нужды и печали.